

268

18. des.

3. gr.
Stofnfé sjóðsins er kr. 700.00. Tekjur hans auk árlegra vaxta, er það fé, er honum kann að berast sem gjafir, áheiti, minningargjafir eða á annan hátt.

4. gr.

Tilgangur sjóðsins er að flýta fyrir og stuðla að kirkjubyggingu í Kópavogshreppi. Yrði kirkjan staðsett í nálægð Hafnarfjarðarvegar. Þegar sjóðurinn er orðinn það stór, að tiltækilegt þykir að byrja á kirkjubyggingu eða þegar kirkjubygging er hafin á þessum stað, má leggja til þess allan höfuðstól sjóðsins og helming árstekna meðan á byggingu stendur. Hinn helmingurinn leggist í sjóð, er síðan verði varið til fegrunar og viðhalds kirkjunni. Sjóðurinn skal ávaxtast í Búnaðarbanka Íslands eða annarri tryggri peningastofnun.

5. gr.

Stjórnina skipa sjö manns, þær fimm konur úr „Sjóstjórnunni“, sem stofnuðu sjóðinn og tveir menn, sem þær velja til með sér. Falli einhver kona frá eða forfallist á annan hátt, velja hinar í hennar stað aðra konu úr kvennadeildinni „Sjóstjarnan“ eða aðra konu, sem búsett er í hreppnum.

6. gr.

Stjórn sjóðsins annast reikningshald hans. Hún semur árlega reikninga sjóðsins og birtir þá endurskoðaða í Stjórnartíðindum ár hvert. Endurskoðun annast einn maður, sem stjórnin kýs, og sóknarprestur.

7. gr.

Skipulagsskrá þessari verður ekki breytt, nema allir stjórnendur sjóðsins séu því sammála.

8. gr.

Leita skal staðfestingar á skipulagsskrá þessari hjá forseta Íslands eða biskupi Íslands.

Stjórn sjóðsins skipa nú: Helga Sveinsdóttir, Guðlaug Kristjánsdóttir, Guðrún Halldórsdóttir, Kristín J. Alexandersdóttir, Rósa Stefánsdóttir, Guðmundur Ásbjörnsson, Þórður Þorsteinsson.

Kópavogshreppi, 23. september 1950.

F. h. sjóðstjórnar

Helga Sveinsdóttir,

Gróðrarstöðin Sæból, formaður.

269

19. des.

Staðfesting forsetans á skipulagsskrá fyrir „Minningarsjóð Sigþórs Róbertssonar“, útgefin á venjulegan hátt ad mandatun af dómsmálaráðherra 19. des. 1950. Skipulagsskráin er þannig:

SKIPULAGSSKRÁ

fyrir Minningarsjóð Sigþórs Róbertssonar.

1. gr.

Sjóðurinn heitir Minningarsjóður Sigþórs Róbertssonar og er stofnaður af hjónunum Sigríði Sigurðardóttur og Róbert Þorbjörnssyni, bakameistara, til minningar um son þeirra Sigþór, sem var fæddur 4. maí 1927 og lézt 19. maí 1950.

2. gr.

269
19. des.

Stofnfé sjóðsins er 5000 — fimm þúsund — krónur. Leggst það í aðaldeild Söfnunarsjóðs Íslands og ávaxtast þar. Skal $\frac{1}{4}$ hluti vaxtanna af innstæðunni í Söfnunarsjóði ávallt leggjast við höfuðstólinn, en $\frac{3}{4}$ hlutar þeirra skulu árlega greiðast til stjórnar minningarsjóðsins.

3. gr.

Tilgangur sjóðsins er fyrst og fremst sá, að styrkja íþróttastarfsemi innan stúkunnar Verðandi nr. 9 í Reykjavík, aðallega með því að stuðla að byggingu skíðaskála. Síðar má styrkja stúkuna til þess að eignast herbergi í væntanlegu félagsheimili og viðhalda því.

4. gr.

Stjórn sjóðsins skipa fimm menn. Stofnendur sjóðsins tilnefna einn mann, framkvæmdanefnd stúkunnar Verðandi tilnefnir 2 menn, en tveir eru sjálfkjörnir og skulu það vera umboðsmaður stórtemplars í stúkunni og gjaldkeri hennar á hverjum tíma. Er stofnendur eru fallnir frá, skal almennur fundur í Verðandi kjósa mann í stjórnina. Kosning og útnefning skal fara fram í janúar ár hvert. Stjórnin skiptir með sér verkum að öðru leyti en því, að gjaldkeri stúkunnar er sjálfkjörinn gjaldkeri sjóðsins.

5. gr.

Auk stofngjafarinnar tekur sjóðurinn við gjöfum og áheitum. Allar minningargjafir leggjast við höfuðstól, en stjórnin ákveður, hve mikið af öðrum tekjum skuli leggjast við höfuðstóllinn árlega. Höfuðstól má aldrei skerða og ekki má veita neitt fé úr sjóðnum fyrr en höfuðstóllinn er orðinn kr. 10000.00.

6. gr.

Sá hluti sjóðsins, sem ekki er í Söfnunarsjóði, skal ávaxtast í sparissjóði Búnaðarbankans í Reykjavík, og leggjast þar árlega við vextir og tekjur, sem ekki er ráðstafað á annan hátt.

7. gr.

Stjórn minningarsjóðsins skal vinna að eflingu hans á þann hátt, er henni þykir bezt henta hverju sinni. Þó er til þess ætlast, að unga fólkið í stúkunni Verðandi hafi einn fjáröflunardag á hverjum vetri fyrir sjóðinn.

8. gr.

Engar greiðslur mega fara fram úr sjóðnum nema formaður og ritari samþykki. Gjaldkeri heldur sjóðbók, þar sem í eru færðar allar tekjur og gjöld sjóðsins. Við hver árslok skal reikningur sjóðsins birtur í stúkunni. Ritari sjóðsins færir í gerðabók allar ákvarðanir stjórnarinnar, og í þá bók skal þessi skipulagskrá rituð. Meiri hluti atkvæða ræður úrslitum á stjórnarfundum.

Formaður sjóðstjórnar boðar til funda þegar tilefni gefst og stýrir þeim. Hann birtir stúkunni reikninga sjóðsins og er fulltrúi sjóðsins gagnvart stúkunni.

Ef tilnefndur eða kosinn stjórnarmaður fellur frá eða gengur úr stúkunni, skal þegar tilnefna eða kjósa annan mann í hans stað.

9. gr.

Stjórnin ber öll ábyrgð á fjárreiðum sjóðsins.

Endurskoðendur stúkunnar Verðandi á hverjum tíma skulu vera endurskoðendur sjóðsins.

269

19. des.

10. gr.
Fari svo, að stúkan Verðandi nr. 9 leggist niður, skal sjóðurinn eins og hann þá verður afhendast Sambandi íslenzkra berklasjúklinga til þess að styðja bindindis- og íþróttastarfsemi meðal vistmanna að Reykjalundi.

11. gr.

Skipulagsskrá þessi öðlast gildi, er hún hefur verið skriflega samþykkt af stjórn stúkunnar Verðandi nr. 9 og staðfest af stórtemplar. Verður henni ekki breytt síðar.

12. gr.

Leita skal staðfestingar forseta Íslands á skipulagsskrá þessari.

Reykjavík, 1. desember 1950.

Sigríður Sigurðardóttir. Róbert Þorbjörnsson.

Samþykk:

Stjórn stúkunnar Verðandi nr. 9

Róbert Þorbjörnsson. Þórunn R. Simonardóttir. Kristján Þórsteinsson.
Björn Guðmundsson. Oddgeir Þorleifsson.

Veiti hér með samþykki mitt.

Skrifstofu Stórstúku Íslands, 8. desember 1950.

Kristinn Stefánsson

— stórtemplar. —

270

4. des.

AUGLÝSING

um afreksmerki hins íslenska lýðveldis.

Með bréfi forseta Íslands, dags. 6. okt. s. l., birtu í Lögbirtingablaðinu 14. s. m., var, eftir tillögu forsætisráðherra fyrir hönd ríkisstjórnarinnar, stofnað afreksmerki hins íslenska lýðveldis.

Afreksmerkinu má sæma innlenda menn og erlenda, er hætt hafa lífi sínu eða heilsu við björgun íslenzkra manna úr lífsháska, enda sé upplýst með lögreglurannsókn, eða á annan fullgildan hátt, um öll atvik björgunarinnar.

Nú er maður talinn hafa unnið til afreksmerkisins, og má þá bera fram beiðni um, að hann verði þessarar sæmdar aðnjótandi.

Beiðninni skal fylgja nákvæm og skilmerkileg skýrsla um hið unna björgunarafrek sönnuð með lögregluréttarrannsókn, eða á annan fullgildan, óvæfengjanlegan hátt.

Beiðni um, að maður verði sæmdur afreksmerki, skal stíluð til forseta Íslands en send ásamt áður nefndum skilríkjum forsætisráðuneytinu, sem annast um, að skjölin komist í hendur nefndar þeirrar, sem skipuð er samkvæmt 6. gr. fyrrnefnds forsetabréfs.

Þetta er hér með birt til leiðbeiningar.

Reykjavík, 4. desember 1950.

Björn Þórðarson.

Guðbjartur Ólafsson.

Matthías Þórðarson.